

四庫全書

史部

# 欽定四庫全書

史部

歷代名臣奏議卷四十二

詳校官檢討<sub>臣</sub>朱依昊

編修<sub>臣</sub>裴謙覆勘

總校官編修<sub>臣</sub>王燕緒

校對官中書<sub>臣</sub>陸湘

謄錄監生<sub>臣</sub>龔秉震

欽定四庫全書

歷代名臣奏議卷四十二

明 楊士奇等 撰

治道

宋哲宗時平章軍國重事文彥博進故事曰太宗淳化三年二月詔以新印儒行中庸篇賜中書密院兩制三館御史中丞尚書丞郎給諫等人各一軸注先是御試進士日以儒行篇為論題帝意欲激勸士人敦修儒行

故特命雕印至是首賜新及第舉人孫何等次及宰輔  
近臣臺閣臣僚並銓司選人聖旨諭令依此修身為治  
仍各於聽事所展掛終身遵奉之真宗大中祥符二年  
十一月帝作文武七條其文臣七條一曰清心謂平心  
待物不為喜怒愛憎之所遷則庶事自正二曰奉公謂  
公直潔已則民自畏服三曰修德謂以德化人不必專  
尚威猛四曰責實謂專求實効勿競虛譽五曰勤察謂  
勤察民情勿使賦役不平刑罰不中六曰勸課謂勸諭

下民勤於孝悌之行農桑之務七曰革弊謂求民疾苦而釐革之以賜京朝官任轉運使提點刑獄知州府軍監通判知縣者武臣七條一曰脩身謂脩飾其身士卒有所法則二曰守職謂不越其職侵撓州縣民政三曰公平謂均撫士卒無有偏四曰訓習謂教訓士卒勤習武藝五曰簡閱謂閱觀士卒識其勤惰勇怯六曰存恤謂安撫士卒甘苦皆同常使齊心無令失所七曰威嚴謂制馭士卒無使犯禁以賜節度使以下至刺史及諸

司使以下任部署鈐轄知州軍縣監押駐泊巡撫者又以禮記儒行篇賜親民釐務文臣其幕職州縣官監務使臣仍並賜勅戒勵令崇文院刻板摹印送閣門分給之

臣伏覩先朝賜臣僚儒行中庸篇及文武臣七條所以激勵士大夫修飾行檢及中外臣僚謹奉官箴其出外任者朝辭日各賜一本仍令閣門丁寧宣諭凡在臣下靡不恭授而奉行慶歷中先朝以

久罷賜七條儒行中庸篇嘗降詔書申明然而後來臣僚久不受賜無所警策至有士行不完進取無恥官守失職苟簡無功臣欲乞舉行此法依例於朝辭日閤門給賜及宣諭誠勵之臣愚以謂敦獎士類鎮靜風俗激勸官吏治守忠廉斯乃為治之大本循致太平之道故敢竭此區區仰干宸聽庶裨聖政伏乞付外施行

著作郎范祖禹進故事曰唐太宗幸洛陽宮苑謂侍臣

曰煬帝作此結怨於民今悉為我有正由宇文述之徒  
內為諂諛外蔽聰明故也可不戒哉

臣祖禹曰昔周公召公之相成王一話一言未嘗  
不以夏桀商紂為戒也其臣危亡之言不絕於口  
其君危亡之言不絕於耳故天下國家可得而安  
也唐太宗見隋煬帝亡國故觀其宮苑而以諂諛  
掩蔽戒羣臣夫知彼之所以亡則圖我之所以存  
而不敢怠矣此三王所由興也



漢昭帝詔曰朕以眇身獲保宗廟戰戰栗栗夙興夜寐脩古帝王之事通保傅傳孝經論語尚書未云有明其令三輔太常舉賢良各二人郡國文學高第各一人

臣祖禹謹按大戴禮保傅傳曰昔者周成王幼在襁褓之中召公為太保周公為太傅太公為太師保保其身體傅傳其德義師導之教訓此三公之職也於是為置三少皆上大夫也曰少保少傅少師是與太子宴者也三公三少明孝仁禮義以導

習之逐去邪人不使見惡行於是皆選天下之端  
士孝悌博聞有道術者以輔翼之使與太子居處  
出入故太子乃生而見正事聞正言行正道左右  
前後皆正人也夫習與正人居不能無正猶生長  
於齊不能不齊言也習與不正人居不能無不正  
猶生長於楚之地不能不楚言也及太子少長則  
入於學學禮曰帝入東學上親而貴仁則親疎有  
序而恩相及矣帝入南學上齒而貴信則長幼有

差而民不誣矣帝入西學上賢而貴德則聖智在  
位而功不墮矣帝入北學上貴而尊爵則貴賤有  
等而下不踰矣帝入太學承師問道退習而端於  
太傅太傅罰其不則而正其不及則德智長而治  
道得矣三代之禮天子春朝朝日秋暮夕月所以  
明有敬也春秋入學坐國老執醬而親饋之所以  
明有孝也行以鸞和步中采齊趨中肆夏所以明  
有度也其於禽獸見其生不忍見其死聞其聲不

忍食其肉故遠庖厨所以長恩且明有仁也明堂  
位曰篤仁而好學多聞而道慎天子疑則問問則  
應而不窮者謂之道道者導天子以道也常立於  
前是周公也誠立而敢斷輔善而相義者謂之充  
克者克天子之志也常立於左是太公也潔廉而  
切直正過而諫邪者謂之弼弼者拂天子之過也  
常立於右是召公也博聞強記接給而善對者謂  
之丞丞者承天子之遺忘也常立於後是史佚也

故成王中立而聽朝則四聖維之是以慮無失計而舉無過事商周之前所以長久者其輔翼天子有此具也天子不論先聖王之德不知國君畜民之道不見禮義之正不察應事之理不博古之典傳不閑於威儀之數詩書禮樂無經學業不法凡此其屬太師之任也天子無恩於父母不惠於庶民不禮於大臣不中於刑獄無經於百官不哀於喪不敬於祭不信於諸侯不戒於戎事不誠於賞

罰不厚於德不疆於行賜與侈於左右近臣吝於  
疏遠卑賤不能懲忿窒欲不從太師之言凡此其  
屬太傅之任也天子處位不端受業不敬言語不  
序聲音不中律進退節度無禮升降揖讓無容周  
旋俯仰視瞻無儀凡此其屬太保之任也天子宴  
廢其學左右之習反其師答遠方諸侯不知文雅  
之辭應羣臣左右不知已諾之正簡聞小誦不博  
不習凡此其屬少師之任也天子居處出入不以

禮冠帶衣服不以制御器在側不以度縱上下雜  
采不以章忿怒悅喜不以義賜與奪讓不以節凡  
此其屬少傅之任也天子宴私安所易樂而湛飲  
酒而醉食肉而飽飽而彊饑而憊自取玩好自執  
器皿凡此其屬少保之任也不知日月之時節不  
知先王之諱與大國之忌不知風雨雷電之眚凡  
此其屬太史之任也昭帝先通保傅傳謂此書也  
唐太宗縱死囚使歸家期以秋來就死皆如期自詣朝

堂上皆赦之

臣祖禹以為太宗縱天下死囚皆如期自歸此由至仁愛人至誠感物之所致也書曰好生之德洽於民心太宗之謂矣

唐明皇東封還至宋州宴從官於樓上刺史寇泚預焉上謂張說曰鄉者屢遣使臣分巡諸道察吏善惡今因封禪歷諸州乃知使臣負我多矣懷州刺史王丘餽牽之外一無他獻魏州刺史崔沔供張無錦繡示我以儉



濟州刺史裴耀卿表數百言莫非規諫如三人者不勞人以示恩真良吏矣顏謂寇泚曰比亦屢有酒饌不豐訴於朕者知卿不借譽於左右也自舉酒賜之

臣祖禹以為漢武帝好用慘酷之吏故董仲舒以守令未得人為言夫一郡守不得人則千里之地受其害一縣令不得人則百里之地受其害欲天下之民皆得其所莫如選擇守令之為急也唐明皇東封過諸州而懷魏濟宋皆有良守亦足見其

時州郡多得人矣豈非姚崇宋璟為相之效乎

宋太宗至道元年正月望夜御乾元樓觀燈召司空致仕李昉賜坐於御榻之側慰撫良久酌御樽酒飲之自取果餌以賜上觀京城繁盛親指前朝坊巷省寺之所今拓為通衢長廊因曰晉高祖優柔無斷稔成奸惡少主昏蒙卒至亡滅洎自漢朝其政愈亂致蘇逢吉史洪肇輩互相猜貳李崧之族枉陷塗炭是時京城人情倉惶殆無生意豈暇營繕都邑乎昉對曰晉漢之事老臣

備經今陛下恭勤治道聽政無倦是致四海清晏輦轂  
繁盛上曰勤故憂民帝王常事耳朕不以繁華為樂益  
以民安為樂

仁宗嘉祐七年上元御宣德門召近臣宗室觀燈酒行  
上顧左右曰朕非欲獨為游觀此因歲時與萬姓同樂  
耳

漢制立春之日下寬大書制詔三公方春東作敬始慎  
微動作從之罪非殊死且勿案驗皆須麥秋退貪殘進

柔良不當用者如故事

蔡邕曰月令曰命相布德和令即此詔之謂也

唐舊制

雅俗之樂皆隸太常明皇精曉音律以太常禮樂之司不應典倡優雜伎開元二年更置左右教坊以教俗樂又選樂工數百人自教法曲於梨園謂之皇帝梨園弟子又教宮女使習之又選妓女置宜春院給賜其家禮部侍郎張庭珪酸棗尉袁楚容皆上疏以為上春秋鼎盛宜崇經術邇端士尚樸素深以悅鄭聲好遊獵為戒上雖不能用欲開言路咸嘉賞之

臣祖禹曰昔紂作靡靡之樂北里之舞以亡其國明  
皇即位之初留意聲樂故其末年耽樂奢侈以致大  
亂幾亡天下人君所好可不慎哉夫太常掌天地人  
之禮郊廟之樂舜命伯夷典禮夔典樂之職也以明  
皇之好音猶不使雅俗相雜國朝祖宗以來教坊宴  
樂隸宣徽院自宣徽院廢乃屬太常以鄭衛之樂瀆  
典禮之司此有司官制之失也

漢高祖七年丞相蕭何治未央宮立東闕北闕前殿武

庫大倉上見其壯麗甚怒謂何曰天下凶凶勞苦數歲成敗未可知是何治宮室過度也何曰天下未定故可因以就宮室且夫天子以四海為家非令壯麗無以重威且無令後世有以加也上悅

臣祖禹曰禹卑宮室孔子美之曰吾無間然矣周宣初即位更為儉宮室小宗廟而致中興之功詩人歌之蕭何不能以道佐漢祖乃襲亡秦之奢侈創業之君一言一動子孫視儆此乃武帝千門萬戶所以興

也臣恭聞太祖皇帝詔宮殿之制惟得赤白累聖遵  
守不敢有加儉德之美過於漢祖遠矣

唐太宗嘗罷朝怒曰會須殺此田舍翁時文德皇后謂  
帝曰誰觸忤陛下帝曰魏徵每廷辱我后退具朝服立  
於廷帝大驚曰皇后何為若是后曰妾聞主明臣直今  
魏徵直由陛下之明故也妾敢不賀帝乃悅

臣祖禹曰詩人美后妃輔佐君子求賢審官國家將  
興必有淑哲之配儆戒以成君子之德若長孫皇后

感悟太宗其可謂賢矣

後漢建武初任延拜武威太守光武親見戒之曰善事  
上官無失名譽延對曰臣聞忠臣不私私臣不忠履正  
奉公臣子之節上下雷同非陛下之福善事上官臣不  
敢奉詔帝歎息曰卿言是也

唐太宗本以兵定天下雖已治不忘經畧四夷也魏徵  
侍宴奏破陣武德舞則俯首不顧至慶善樂則諦玩無  
斂舉有所諷切如此

慶善樂者  
文德之舞



漢武帝建元三年上始爲微行常以夜出自稱平陽侯  
旦明入南山下射鹿豕狐兔馳騫木稼之地民皆號呼  
罵詈鄠杜令欲執之示以乘輿物乃得免又嘗夜至栢  
谷投逆旅宿就逆旅主人求漿主人翁曰無漿止有溺  
耳且疑上爲姦盜聚少年欲攻之主人嫗覩上狀貌而  
異之止其翁曰客非常人也且有備不可圖也翁不  
聽嫗飲翁以酒醉而縛之少年皆散走嫗乃殺雞爲食  
以謝客明日上歸召嫗賜金千斤拜其夫爲羽林郎

臣祖禹曰仁宗皇帝皇祐二年四月御迺英閣讀漢書東方朔傳至武帝微行數出仁宗曰帝王每出須中嚴外辦何容易如此侍讀丁度對曰武帝以承平日久藉文景之資所以窮志極欲仁宗曰若安寧之時常思危亡之戒豈有後悔臣愚竊謂武帝以天子之尊而好狂夫之遊困於逆旅幾至危殆考其行事足為永戒仁宗皇帝特發德音所以垂訓萬世也

唐肅宗為太子時常侍膳尚食置熱俎有羊臂臠

臂臠肱骨

也臍音  
奴到反

明皇顧使太子割肅宗既割餘汚墁在刀以餅  
潔之上熟視不懌肅宗徐舉而啖之上甚悅謂太子曰  
福祿當如是愛惜

臣祖禹曰明皇教太子愛惜福祿不棄一餅可謂知  
稼穡之艱難矣然於其身窮極奢侈用財物如糞土  
卒致天下大亂何其明於子而闇於己乎書曰非知  
之艱行之惟艱明皇之謂矣

史記樂書君子曰禮樂不可斯須去身致樂以治心則

易直子諒之心油然而生矣

致猶深審也樂由中出故治心也易平易直正直子諒愛

信也易直子諒之心生則樂樂則安安則久久則天天則

神天則不言而信神則不怒而威

若善心生則寡於利欲寡於利欲則樂矣

志明行成不言而見信如天也不怒而見畏如神也

致樂以治心者也致禮以治

躬者也致禮以治躬則莊敬莊敬則嚴威

禮自外作心故治身

中斯須不和不樂而鄙詐之心入之矣

鄙詐入之外貌謂利欲生

斯須不莊不敬而慢易之心入之矣

易輕也

故樂也者動

於內者也禮也者動於外者也樂極和禮極順內和而

外順則民瞻其顏色而弗與爭也望其容貌而民不生  
易慢焉故德輝動於內而民莫不承聽理發諸外而民  
莫不承順鄭玄曰德輝顏色潤澤也理容貌進也故曰致  
禮樂之道舉而措之天下無難矣

臣祖禹謹按禮記樂記祭義皆載此語司馬遷取之  
以為樂書益古之君子傳先王之法言論禮樂之本  
而造於道德之精微孔子之門人祖述而傳之亦猶  
大學誠意正心齊家治國之說也此學者所當盡心

而人君所宜留意臣是以敢獻之

唐明皇每酺宴先設太常雅樂坐部立部繼以鼓吹胡樂教坊府縣散樂雜戲又以山車陸船載樂往來又出宮人舞霓裳羽衣又教舞馬百匹銜杯上壽又引犀象入場或拜或舞安祿山見而悅之後祿山反既克長安命搜捕樂工運載樂器舞衣驅舞馬犀象皆詣洛陽

司馬光論曰聖人以道德為麗仁義為樂故雖茅茨土階惡衣菲食不恥其陋惟恐奉養之過以勞民費

財明皇恃其承平不思後患殫耳目之玩窮聲技之巧自謂帝王富貴皆不我如欲使前莫能及後無以踰非徒娛已亦以誇人豈知大盜在旁已有窺窬之心卒致鑾輿播越生民塗炭乃知人君崇華靡以示人適足爲大盜之招也

史記吳世家吳王僚九年公子光伐楚拔居巢鍾離初楚邊邑卑梁氏之處女與吳邊邑之女爭桑二女家怒相滅兩國邊邑長聞之怒而相攻滅吳之邊邑吳王怒

故遂伐楚取兩都而去

臣祖禹曰疆場之事常起於細微故兩女子爭桑而吳楚相攻由漢以來守邊之吏或忿爭細故或徵幸功賞以怒隣敵至兵連禍結而兩國受其敗人君不知者多矣可不戒哉

漢光武建武八年帝自征隗鄩隴右潰鄩奔西域遣大司馬吳漢征南大將軍岑彭圍之時公孫述將李育將兵救鄩守上邽帝命虎牙大將軍蓋延建威大將軍耿



弇攻之潁川盜賊寇沒屬縣河東守守兵亦叛帝自上  
邽晨夜東馳車駕還宮勅彭書曰兩城若下便可將兵  
南擊蜀虜人苦不知足既平隴復望蜀每一發兵頭鬚  
爲白

臣祖禹曰漢光武以兵定天下中興漢室是時隗躡  
據隴公孫述據蜀未得息師光武厭苦軍事雖謀臣  
猛將衆多猶曰每一發兵頭鬚爲白其憂畏如此蓋  
深知百姓疾苦懲用兵之爲天下害也

順帝時災異屢見陽嘉二年春郎顗上書其四事曰易傳曰陽無德則旱陰僭陽亦旱陽無德者人君恩澤不施於人也陰僭陽者祿去公室臣下專權也自冬涉春訖無嘉澤數有西風反逆時節朝廷勞心廣為禱祈薦

祭山川暴龍移市

董仲舒春秋繁露曰春旱以甲乙日為蒼龍一長八尺居中為小龍七

各長四尺於東方皆東向其間相去八尺小童八人皆齋三日服青衣而舞之夏以丙丁日為赤龍服赤衣季夏以戊巳日為黃龍服黃衣秋以庚辛日為白龍服白衣冬以壬癸日為黑龍服黑衣牲各依其方色皆燔雄雞燒穀豬尾於里北門及市中以祈焉禮記歲旱魯穆公問於縣子縣子曰為之徙市不亦可乎

臣聞

皇天感物不為偽動災變應人要在責已若令雨可請

降水可攘止則歲無隔并太平可待然而災害不息者

患不在此也

不在祈禱

立春以來未見朝廷賞錄有功表顯

有德存問孤寡賑恤貧弱而但見洛陽都官奔車東西

收繫纖介牢獄充盈臣聞恭陵火處比有光耀

比頻也時恭陵

百丈廡災仍明此天災非人之咎

有光耀不絕丁丑大風掩蔽天地

風者號令天之威怒皆所以感悟人君忠厚之戒又連

月無雨將害宿麥若一穀不登則饑者十三四矣陛下

誠宜廣被恩澤貸贍元元昔堯遭九年之水人有十載之畜者簡稅防災爲其方也

簡少也方法也

願陛下早宣德澤

以應天功若臣不用朝政不改者立夏之後乃有澍雨於今之際未可望也若政變於朝而天不雨則臣爲誣上愚不知量分當鼎鑊書奏特詔拜郎中辭病不就即去歸家至四月京師地震遂陷其夏大旱秋鮮卑入馬邑城破代郡兵明年西羗寇隴右皆畧如顓言

臣祖禹曰天人之交相去不遠故漢世儒者各以所

學推原災異其言多驗臣恭聞仁宗皇帝最深洪範之學每有變異恐懼脩省必求其端近世學者廢而不習人君奉順天道不可不留意也

漢文帝時賈誼上書曰三代之禮春朝朝日秋暮夕月所以明有敬也

朝日以朝夕月以暮皆迎其初出也

春秋入學坐國老執

醬而親饋之所以明有孝也行以鸞和步中采齊

樂詩名也

字或作齊又作

趨中肆夏

亦樂詩名趨疾步也凡此中者謂與其節相應也並音竹

仲所以明有度也其於禽獸見其生不忍其死聞其聲

不食其肉故遠庖廚所以長恩且明有仁也夫三代之所以長久者以其輔翼太子有此具也鼂錯上書言人主所以尊顯功名揚於萬世之後者以知術數也故人主知所以臨制臣下而治其衆則羣臣畏服矣知所以聽言受事則不欺蔽矣知所以安利萬民則海內必從矣知所以忠孝事上則臣子之行備矣此四者臣竊爲皇太子急之

臣祖禹曰賈誼之學本於詩禮故欲人君知禮義鼂

錯之學本於刑名故欲人君知術數三代之君以禮義治故下以誠應之秦漢之君以術數治故下以詐應之人主臨制羣臣聽言受事錯皆以為術數而不知聖人之道無二唯一以至誠而已唐太宗猶恥以權術接臣下而況於三代之主乎又曰自唐天寶之亂兵革不息訖於五代後周顯德凡二百十有五年天下分裂為八九生民糜爛於兵周世宗以雄武之才在位六年南征北伐以強中國雖綱紀稍振而大功

未成太宗受命削平僭亂然後海內為一蓋天將啓  
太祖之運以授聖人世宗征伐之功實為有宋開創  
之基也觀周顯德以前治少而亂多然後知本朝百  
三十餘年中外宴安自三代以來未之有也可不兢  
兢業業以守之哉又曰古者至治之世麟鳳在郊數  
龜龍游宮沼河出圖洛出書舜之時蕭韶九成鳳凰  
來儀文王之生鶯鶯鳴於岐山聖人在上則四靈為  
畜所以謂之瑞也漢武帝幸雍祠五時獲一角獸若



庶然有司以爲麟武帝博謀羣臣而終軍上對宜因  
昭時今日改定告元苴白茅於江淮發嘉蹕於營丘  
帝甚異之由是改元爲元狩臣竊考元狩之間有淮  
南衡山之獄坐死者數萬人吏益慘急而發令察武  
帝方甘心快意結怨於匈奴命衛青霍去病等將兵  
連歲出征匈奴亦數入爲寇於是天下騷然倉庫空  
虛貧民流徙乃與公卿議白金及皮幣以奪商賈之  
利取諸侯之財吏民犯法者不可勝數於是酷吏用

事多至公卿而繡衣直指之使斬斷於外當此之時  
生民如處於鑪炭之上然則何以致天地之和氣麟  
曷為出哉昔魯哀公十四年西狩於大野獲麟以為  
不祥以賜虞人仲尼觀之曰麟也然後取之麟於魯  
出非其時惟聖人識之故春秋書獲麟武帝得一角  
獸而有司謂之麟終軍因勸以改元封禪甚矣羣臣  
之諛也後世言帝王窮兵黷武嚴刑峻法者必曰秦  
皇漢武蓋以始皇無道而武帝亦近似之矣考其行

事豈獨武帝之過哉其臣諛佞以成之也孟子曰長  
君之惡其罪小逢君之惡其罪大漢之羣臣豈不然  
哉

范祖禹為右諫議大夫上奏曰臣竊以朝廷治道必歸  
於一祖宗創業傳之萬世造立法度皆因衆人之智積  
日累月講磨而成非獨出一人之意取一時之便而已  
累聖相承百三十年比之前代治安最為長久其法有  
已成之效此可信而不疑也然行之既久則其間不能

無弊熙寧之初先帝勵精求治思致太平稍欲更革弊  
事以光大祖宗之業而王安石用意過當獨任私智悉  
排衆論呂惠卿曾布之徒欲以改法進身一切變易祖  
宗舊政至今天下以爲不便前後臣僚論之已詳不待  
臣言而知也自魏晉以後官名不正國家承平日久未  
遑制作元豐中先帝置局講求此誠一代大典然有司  
亦失先帝本意一切遵用唐之六典夫唐六典雖修成  
書然未嘗行之一日今一一依之故自三省以下無不

煩冗重複迂滯不如昔之簡便臣恭聞先帝已厭官制之煩但未及修完不幸早棄天下今二聖垂拱循守成規除去弊事十已七八海內安靖已有成效今臣之愚竊謂朝廷既以王安石之法爲非唯當修復祖宗舊政則天下無事伏望陛下明諭大臣凡所措置變改悉遵故常無得出意於新舊之間別立一法自官制兵制將法民事有未便者更加修完祖宗時所無而今所有其可行者存之不可者去之祖宗時所有而今所無可復

者復之如官制正名則如先帝之規事實則仍祖宗之舊其他可以類推如此則上可以存祖宗經久之法成先帝制作之意下亦便於當今之宜庶使法度不至數變紀綱不寢隳壞

校書郎李昭玘進策曰昔先王和同四方連絡萬里使家與家相愛人與人相親保之而不忘合之而不散者有道以維之有政以屬之有法以制之而已以民情爲易離也故以九兩繫焉牧以地得之則食之者不去長

以貴得之則事之者不忘師以賁得之儒以道得之則  
樂其教者安宗以族得之主以利得之則親其上者服  
友以任得之則善有以相成數以富得之則利有以相  
養以民心爲易危也故又以本俗六安焉媼宮室所以  
同其生族墳墓所以同其死聯兄弟所以同其恩聯師  
儒朋友所以同其義同衣服所以同其禮故能上下統  
一遠近和合父與父言義子與子言孝長與長言友幼  
與幼言弟恩足以合情而相愛文足以飾貌而相接此

維之有道者也先王既有以繫其民又有以安其俗猶以爲不足恃也故五家爲比使之相保五比爲閭使之相受四閭爲族使之相葬五族爲黨使之相救五黨爲州使之相賙五州爲鄉使之相賓至於守望相助出入相友嫁娶相媒有無相貸疾病相恤祭祀同福死喪同哀男子不足於耕也相從而助耕婦人不足於績也相從而助績一鄉之事皆通也無求而不得一鄉之情皆同也無爲而不和此屬之有政也先王以謂有政以屬



於前無法以制於後未足以防民也故徙於國中及郊  
則從而授之徙於他則以旌節行之無授無節則以園  
土納之竄伏者無所匿欺偽者無所容無事而出鄉則  
鄉必問無事而出關則關必譏民不擾於流寓吏不勞  
於呼索由此而登於司民則可以知其數由此而比於  
鄉大夫則可以均其力由此而歛於司稼則可以制其  
食由此而會於小司徒則可以用其衆此制之有法也  
維之既有道屬之既有政制之既有法不幸旱乾水溢

民食不足轉流四方則非道之所能維非政之所能屬  
非法之所能制雖天屬俯仰之間不能以自存又焉有  
守邑地居家室而不去者哉故爲之鄉里之委積以恤  
艱阨爲之縣都之委積以待凶荒又爲之荒政十二以  
聚萬民不必歛其利而利可散不必盡其征而征可薄  
力則弛其勞刑則緩其責舍禁以赦小害去幾以釋小  
過省禮而使勿充殺哀而使勿致樂則蕃而不用昏則  
多而不備索鬼神以致福去盜賊以除害雖凶年饑歲

民猶安居重家佚居飽食故自少壯以至於老髦老髦  
以至於死亡食其田飲其井十里之外不知道途百里  
之外不傳風俗此先王之保民也可謂至矣自夫仁政  
不行井地不均民易其業官失其守內不能制其情外  
不能知其數此宣王料民於太原仲山甫所以非之也  
迨夫戰國交侵土地時易封疆不足以限其遷徙城邑  
不足以遏其流亡管仲以區區瀕海之齊制國為二十  
五鄉郊之內自軌以至帥郊之外自邑以至屬以相糾

聯以相保合少相居長相遊居處相樂行作相知以守  
則固以戰則服故桓公九合諸侯而號為彊國者善保  
民故也自熙寧之初嘗詔天下行保伍之令此有意於  
三代之遺法也行之數年法雖具存而民未安土義不  
足以相守則時有桴鼓之警恩不足以相保則或起父  
子之訟壯力分於出贅世業入於兼并戶口隱於圖板  
夫家脫於聯伍輕鄉危家遠出千里故秦多晉寇而魯雜  
齊語祭祀不從丘壠老死不知子孫罰不及於其鄰罪

不及於其友其犯法也輕其背也衆雖欲均地著之政  
立土斷之法未易制也昔三代之時里無閒民民無遊  
業居皆勸功樂事之人出則爲伏節死難之士以守則  
國富以戰則兵彊今天下壯有力之民僑寓雜處散於  
四方手不服耒耜之勤心不知田畝之樂爲淫巧奇技  
屠販遊博其無理之甚者嘯聚不逞殺人於貨邑里不  
告訐門閭不訶問縣官鄉吏察治無術計戶而不得其  
家計家而不得其人居無與守出無與戰此爲國計者

未嘗不深惜之也昔者既詔天下置義倉矣義倉設則  
雖年穀不豐民可仰食貧不至於易業饑不至於輕家  
然後禁游手抑末作去舊里者必告入新鄉者無容如  
此則民無流散之苦吏無逋逃之憂三代之法可漸致  
而力行矣

昭玘又進策曰嘗觀漢唐任刺史或輒親見問退而考  
其所行以質其言或錄其姓名得才否狀以擬廢置或  
增秩賜金以勞其成或臨軒受服以光其遣故漢之吏

事號為稱職唐之任人所得十五蓋重郡縣之官慎臨  
人之責自古皆然不特為今日之所急也愚竊論之天  
下之事有名變而實存者後世習於名而遂略其實此  
名實所以並廢而事功不立也今之守令視古猶諸侯也  
非不有境土也獨不得斂其賦爾若勸課之責則在焉非  
不有城邑也獨不得專其地爾若守禦之責則在焉非不  
有官府也獨不得置其屬爾若察治之責則在焉非不有  
學校也獨不得命其士爾若教養之責則在焉非不有軍

旅也獨不得專其政爾若簡習之責則在焉或以謂古之諸侯與天子同體而尊故其任重今之諸侯與朝廷異勢而卑故其任輕然不知地土封爵名數儀物雖今日之所輕而重穀阜民養材教士無以異於昔日之所重承今日之責者務覈簿書促期會以文法吏自處其於詔令之意教化之實玩以為不急歲時上計苟於文具而已必欲宣德流化移風易俗一陶天下之和固亦難矣故勸課不修則耕稼不時田野荒汙水旱無具老壯流徙守禦不修則



羣小嘯聚屠牛發冢焚燒區落白晝殺人察治不修則吏  
行貪污交貨賣法公義不肅私倖爭出教養不修則學舍  
蕪沒圖籍塵委人材徧野士論淺俗簡習不修則卒伍墮  
氣器械鈍弊春秋角牴坐作如戲凡此者吏不知其責故  
也國家頻年以來除繇役興農利聯什伍講學校練軍士  
其法備成其令數下郡縣之吏猶不能盡心率職以稱上  
意蓋其修飾形迹附就名數苟可以奉朝廷之法其實無  
至誠惻怛以行朝廷之意此特失於廉按未精而督責太

輕爾若三代之時諸侯之見天子也春以受其圖秋以  
比其事夏以陳其謨冬以協其慮時以發其禁衆以施  
其政天子之撫諸侯也諭言語協辭命諭書名聽音聲  
同度量成牢禮同器數修法則有擇人以道其政事有  
掌交以道其德意故能均政刑合禮樂一道德同風俗  
以天下為一家以中國為一人者察治詳故也今夫州  
為之守邑為之令星列棊布散於四方萬里之遠道不  
足以一揆法不足以一守無禮以制之無政以合之凡

朝廷之政事法度雖時下其詔丁寧告戒而奉承之吏  
習爲苟簡大事則行文檄記條目小事則掛屋壁束高  
閣至於獄訟農穀貨幣征租力役之常歲爲一書以上  
於朝其人之賢不肖其治之得失其事之利害以謂盡  
在於此是亦疎矣朝廷常患其弊而設監司矣委之以  
廉按付之以督責修職者薦於上不才者罷而去此代  
天子知人者也然而監司未必皆賢也庇姦則以寬縱  
爲度喜事則以苛細爲功惰怯則操鎮靜之說強忍則

傲刻薄之利挾氣者輕於沮下幸名者急於趨上取未必中也或出於親戚故舊之先去未必當也或出於怨嫌忿怒之表其情狀之相攻自治且不暇又況治人哉朝廷所望於人者乃止於如此則監司未必爲得人也夫郡縣之治視監司指顧爲近監司之治望朝廷耳目爲遠天下之事嘗勞於總覈難於察治者蓋在此也唐制監察御史掌巡按州縣其一察官人善惡其二察戶口流散帳籍隱沒其三察農桑不勤倉庫減耗其四察

妖猾盜賊不事生業其五察德行孝悌茂材異等藏器  
晦迹以待時者其六察黠吏豪宗兼并縱暴冤抑不伸  
者方今莫若時詔御史分出而臨遣之使郡縣覈於監  
司監司覈於御史御史致其狀於宰相則天下郡縣之  
治可指掌而議可僂指而分庶幾古循吏之風復見於  
今日矣

昭玘又進策曰天下之治涉於道者無患乎至略涉於  
事者無患乎致詳盖道之所以官天地府萬物役使羣

動運之以精神感之以會通聖人端冕南面恭已而已  
事所以應時而造推物而行號而讀之則有名指而議  
之則有數自其名而舉之則小大先後不可易也自其  
數而積之則一二三四不可亂也然而日之來者無窮  
往者益遠事之方至者常謹幾成者常忽此所以苟完  
於耳目之前寢微於歲月之久以至曠敗缺漏紛紜倒  
迕而不可考者常以此也有一成而不變或先易而後  
難或初因而終革不有圖籍日陳於前操以為驗稽以

為決則朝廷上下失於苟簡官人百吏習於惰偷上以  
方信人臣有為之功而矜覽緒餘下亦操人主不自任  
之說以彌縫罅漏雖欲虛心以望成功拱手以迎太平  
是亦踈矣周之治官也小宰歲終令羣吏正歲會月終  
正月要旬終正日成司會掌凡在書契圖板者之貳以  
逆羣吏之治而聽其會計以參互考日成月要考月成  
歲會考歲成以周知四國之治以詔王及冢宰廢置冢  
宰歲終則令百官府各正其治受其會聽其政事詔王

廢置三歲大計羣吏而誅賞之不獨官府之治如此也  
春朝諸侯以受天下之圖籍而行人之官以利害爲一  
書禮俗政事教治政刑逆順爲一書凶災貧阨爲一書  
其康樂和親安平爲一書以反命於王以周知天下之  
故夫內以弊羣吏之治外以周知天下之故舉無遺事  
事無遺慮其職守之勤怠功利之登下用度之多寡經  
畫之利害百日之所積者一日而槩舉之百人之所共  
成者一人而坐見之任事之臣不敢爲偷得之利以倖



耳目之所不及天下之治常為之不厭通而不倦考覈  
詳故也後世不知其法以謂帝王之道必無為而用天  
下不達無為者無不為之說政教禁令紀綱法度一切  
曰有司存事常至於偏弊而不救者無術以舉之也故  
大事幸天子之不問小事幸大臣之不知漢文帝問丞  
相決獄錢穀數而對之以廷尉內史宣帝時郡國上計  
簿具文而三公不以爲意上下如此則何以督察天下  
而與之仰成哉今陛下必以朝廷官府已行之法度緝

爲政錄有几有目有要有會而時自閱覈如裘提領屈  
五指而頓之不勝其舉矣使官人百吏宿道向方勸勤  
樂職夙夜不惰可謂治術詳矣臣聞五霸不及其臣故  
委之以能托之以國三王臣主俱賢故合謀相輔五帝  
其臣不及故親自處事於法官之中今陛下訓迪厥官  
總核名實此聖功成終之時也惟陛下加意而已

畢仲游言併州縣曰竊觀遠近之勢要在均一而易治  
昔周之盛時畫千里爲王畿王畿之外制天下爲九服

九服相距各五百里而要服之內封其地者蓋十有八  
百餘國以此知其欲均一也封國之制侯百里伯七十  
里子男五十里不能五十里者謂之附庸以營丘曲阜  
之封而不過百里以此知其欲易治也及秦變古裂天  
下為郡縣一郡之地包十諸侯之封猶倍侯伯之制天  
下之地始不均而民始愁愁苦其難治矣伏惟朝廷建  
功立事一出先王之道而乃削郡成邑割邑成聚所以  
省官併員寬去力役幸天下者甚厚然一邑併一邑併

去之邑則力寬併入之邑則力重邑之有併也有數百  
人之邑有四五局之官既併矣則役去其十數而官存  
其一二故其力寬而其併入之邑一官任二官之事  
一人任二人之役昔之訟者五今之訟者十昔之往來  
者一宿而至今之往來者再宿而至其他可以類舉矣  
是故其力重夫小邑併大邑必無四面之均以南併北  
則南長而北促以西併東則西寬而東狹促狹之鄉其  
民逸寬長之鄉其民勞此又理勢之自然也雖於出錢

之數可省三數然酒稅虧折則必稱此矣以淮甸一路言之邑小則易爲治地大則難其人光之仙居壽之壽春泗之昭信此小而易爲治者也廬之舒成蘄之蘄水光之固始此大而難其人者也理宜割大以爲小今乃併小而爲大捨易治而求難爲非其術矣且今州縣之役豈不輕州縣之吏豈不省昔先王之封國也雖子男之邦必有宗廟祭祀之費有人徒祿廩之厚有兵甲車馬之衆而城郭道路關梁廬館尤嚴於賓客之事而又

歲時使人存覲若歸賑賀慶致禮之來又有四隣之交  
巡狩朝覲會同聘問之集所以設官致員役民力者蓋  
甚繁且密而州縣之治存於古者無幾則天下吏員之  
未易民力之未輕不在此矣為今之策宜先求建國之  
大法要在均一而易治凡邑之大者割其大以補小邑  
之小者增其小以成大置一縣之封必度四面之界分  
長鄉以補短分寬鄉以補狹縣相比州州相較大者不  
使如固始之寬小者不使如仙居之狹此之謂均戶口

賦稅之籍徭役獄訟之制大略相等賢者俯就而有餘  
不肖者勉強而無累此之謂易治其有大邑次大邑雖  
割而猶大者則增官小邑次小邑雖割而猶小者則減  
役官不求苟省可置則置役不求苟廢可存則存如是  
則民不驚動而地均官不勞擾而治定指顧相視而遠  
近之勢已分文檄相移而分割之功已就官吏之所願  
民情之所安公家之所便公家併兩爲一廢州爲縣廢  
縣爲聚有寬省之小利成難治之大患官吏之所重爲

民俗之所驚駭違今時古法者相去遠矣均一易治之  
說惟朝廷擇焉

畢仲游又上言曰治一鄉必有治一鄉之具治一國必  
有治一國之具治天下必有治天下之具具者非若簋  
簠俎豆尊勺鼎鼐可陳於前也由是而治者謂之具聽  
斷獄訟簿書期會所以治一鄉也守法令拊循其民以  
承事天子所以治一國也明制度不得相踰越貧富貴  
賤各安其分而易足所以治天下也以大治小則小有



所不能容故孔子之武城聞絃歌之音而笑以小治大則大有所不能治故孟子不學諸侯之禮而言其略三代而下不知治具之有小大以簿書法令治鄉國之具而治天下是以天下而終不大治昔孝文之時賈誼謂大臣不報期會之間爲大故至於俗流失世敗壞因恬而不知惟爲可太息孝宣時王吉亦言公卿未有建萬世之長策舉明主於三代之隆而上下僭差人人自制是以貪財誅吏不畏死亡而孝文孝宣卒莫能用所以

然者治大者其効緩而遠治小者其効速而近人君有治天下之心而求近効以語禮俗制度禁防之事則指以為迂濶而見簿書法令聽斷獄訟則以為治天下如是而足雖有唐太宗之賢與房魏論周禮語未卒而有畫虎之疑又況不及太宗者則天下之不大治凡皆以小治大而無其具故爾今國家傳序相習百有餘年方內無事幾於致平殆非漢唐之比而禮俗制度禁防之不立反甚於漢唐田宅奴婢車馬服用恣民之所自為

而莫有限樂漢唐之小具不思三代之大治豈非以上  
下相安風俗已成而難於驚動耶是亦未知講爾昔楚  
王患其國之庫車欲下令使高之孫叔敖曰令數下民  
不知所從請教里人高其梱乘車者皆君子不能數下  
則車自高矣從之半歲而楚國無庫車蓋國家立事好  
爲法令而以深罰重賞隨之法令既繁而罰深賞重無  
以措其手足是以民驚動而事不立今如倣庫車之意  
定爲田宅奴婢車馬服用之等級在上者躬化以行之

簡其法令平其賞罰有不從者第禁勿使仕宦庶人則重租賦以困辱之久以歲月無求近効則三代治天下之具將復立於今日度越漢唐而頌聲興然則禁勿使仕宦重租賦以困辱而終不爲深罰重賞者亦今日治天下之相耳何患乎驚動

孔文仲對策曰臣伏惟陛下下明詔降清問講求萬世之統皆非愚臣之所能及也然臣竊有深憂者陛下求言好善之隆名遠出百王之上至於用言納諫之道有

未克盡其極爾何者陛下涖昨之初首開轉對以延疎  
遠切直之言召羣臣以詢安危利害之策者此陛下天  
資謙恕思得深謀至計以補所未逮也而言之既多聽  
之既久卒未聞采一事用一畫見之天下至於近日四  
方之人與夫朝廷之上賢卿誼老交章累䟽論列時政  
得失臣考之公議以爲雖臯夔周召之謀所以致君福  
民寧九廟而安萬世者公讜不能過此矣而陛下聞之  
若不聞見之若不見豈其急近論而略遠慮安小補而

捐大忠乎此臣所大懼也臣願陛下首思聽言用諫之義不聽則已聽則博同天下之心不用則已用則兼取遠近之策然後動無遺事舉無失計而善政可行太平可議矣臣將論天下事先述此以獻臣誠愚闇不知大體惟陛下省納焉聖策曰在昔明王之治天下仁風翔洽德澤汪濊四序調於上萬物和於下兵革不試刑辟弗用內則雋賢居位以熙於王職外則戎夷嚮風以修於歲貢建皇極以承天心斂時福以錫民庶然後日星

雨露鳥獸草木効祥薦祉書之不絕甚尊慕之其何術而臻此與臣聞天下之術有大小而人君用之有先後先其大而後其小則用力不勞而天下治宜先而後可大而小則用力愈勞而天下亂天下之術其大者能正其始是也其小者不能正其始是也在昔明王之治天下仁翔而德洽四序調而萬物和以至兵偃刑措雋賢修職夷狄納貢建皇極而天道應斂五福而民氣洽吉祥見於上珍符出於下者正始之術行也後世之治天

下萬事失其序而災害洊至者正始之術廢也陛下追慕古昔治功之美而諮求致之之術臣請遂言正始之說夫天下之道三曰王曰霸曰強國天下之本一曰即位即位者王所以自正也始不以正及其末也雖欲變而正之亦無及矣是故始爲強國未有能終之以霸政者也始爲霸政未有能終之以王術者也孔子作春秋書元年春王正月公即位夫元年正月者一年一月也而變之曰元與正者欲人君當即位之初體元以居正也



元者善之本也正者道之極也人君能於治初清明力行善本而躬履道極此王道所以成也且夫一之以道德淳之以仁義此王道也行之以仁義雜之以功利此霸道也專用權謀不顧義理此強國之術也及考其見於効也王道行於數十歲之外詠歌畏愛猶深結於民心而不忍去之霸政止能及其身至子孫之世則廢熄不講強國之術民之視上相疾如仇讎伺其有間則相與蹈藉傾覆之矣凡三道者得失之報若白黑然而世

主趨王道者少適霸政與強國者多何也蓋王道所及甚遠而不能取成於倉卒霸政與強國爲敝雖深而能見効於目前人之常情薄遠効而貴速成是所以失趨適之正也漢之文景唐之太宗皆有可致之資又有能致之勢而致治安國不能與三代並者失其所適也伏惟陛下聽睿神武得之於天可謂有能致之資矣日月所被皆在圖籍可謂有必致之勢矣當承祧踐極之始端本清源之日欲王而王欲霸而霸欲強國而國強得

失之策繫於一舉而已譬猶御八駿之馬馳九軌之路  
擇而後往則得其正一或不慎以意馳之則宜之燕者  
或造於楚矣宜往吳者或之於秦矣則夫事物交會之  
間不可不慎所適如此臣竊觀近日朝野之論而考陛  
下意之所適求之於古不能無疑且天下之所以治者  
貴義而不貴利也奈何先之以興利仁人之所以尊者  
明道而不計功也奈何一之以望功萬事所以成就者  
遲久也奈何期之以迫急四方所以畏愛者愷悌也奈

何驅之以威刑荀卿曰國者巨用之則巨小用之則小揚  
子曰好大而不為大不大矣好高而不為高不高矣此  
而望仁翔而德洽四序調而萬物和以至兵偃刑措僇  
賢修職夷狄納貢建皇極而天道應斂五福而民氣洽  
吉祥見於上珍符出於下豈不難哉臣願陛下曠然大  
變而行衆人之所不能為卓然自致而行前世之所不  
能到尊尚王道賤略強霸其尊之也若抱渴而需飲其  
賤之也若辭闇而即明屏去諛佞親近忠直數御東序

開陳圖書講前代之興亡論百王之成敗以其善行以  
其惡戒避其所得趨其所失仰而思之以夜而繼日也  
幸而得之輟寐以待旦也有言逆於心必求諸道有言  
遜於志必求諸非道用其粹而遺其駁操其要而治其  
煩凡此皆王道之術而正始之論也陛下深講而力行  
之則馴致古昔明王之道如決流抑墜爾何患慕之而  
未臻乎聖策曰朕承祖宗之業託士民之上明有所未  
燭化有所未孚又退託於任太守重艱於負荷思聞讜

直之言以輔不逮庶幾乎治此見陛下虛心訪道至誠惻怛之至意也如臣之愚何足以奉承之而臣嘗聞之曰明欲被於萬物化欲孚於四方未有不自治心始也夫治心者聖人所以窮理之術也人之有心猶天之有極也是故晦冥陰默之中不足以辨南北而能考而正之者極星是也是非紛雜之間不足以審真偽而能別而分之者心官是也心也者天下之至正也又能養之以正則善惡是非萬事之理無不白矣齋戒以持之使

其不失清虛以守之使其不亂問以通之謀以發之此  
治心之始也及其成也不思焉未嘗不應於理也不勉  
焉未嘗不合於道也藏之為志氣而無不克發之爲事  
業而無不濟如權衡設於此而萬鈞之重銖兩之輕無  
所不辨如槃水設於此而大如天地細如毛髮無所不  
察此治心之効也心正則明盡明盡則化至此自然之  
道陛下思聞讜直之言庶幾乎治此天下之盛福也臣  
聞適於耳目之娛而爲心腹之害者柔從說順也雖安

夷之而常患其有餘忤於一日之意而爲百世之利者  
剛方讜直也雖養長之而常患其不足古之聖賢屈已  
執謙和顏遜志加之以勞來之厚助之以勸賞之渥凡  
以養天下剛方讜直之節使森然立於吾庭爲國家廟  
社之福故夫伏格趨鼎引衣斷檻破裂麻制封還詔書  
如此之類日常有之而不爲怪者所以廣聰明而來下  
情也臣願陛下容忍近臣之獻言開納遠臣之論事廣  
諫諍之任以助聞見補憲肅之官以振綱紀而又力以



謙冲假借深養剛方讜直之氣如漢高祖之於周昌晉武帝之於劉毅然後可以得天下讜直之言以輔治道不然猶却行求前徒舉以訪臣又安補於萬一哉聖策曰蓋人君即位必求端於天而正諸已惟五事得其常則庶徵協其應有國以來靡敢自肆而和氣猶鬱大異數見廼元年日蝕三朝洎仲秋地震數路而冀方之廣爲災最甚自處於弗德之致夙寤晨興思其所以此見陛下畏天飭已恐懼修省之盛德也臣聞日食地震者

陽微陰盛也而或曰日食者歷之常數也臣請辨之一百七十三日有餘而爲一交然後食此歷家之說也而春秋襄公二十一年之九月十月二十四年之七月八月皆未及一交則食此歷之不合一也二漢之政西京爲盛東京爲衰大率皆二百餘年爾而西京四十五食東京七十四食食之疏密應政之盛衰而然曾無定數此歷之不合二也是日食者非可託於歷其要爲陰盛之應也陽浮爲天而主於動陰凝爲地而本於靜宜靜

而動者陰越其分而擬諸陽陽之與陰君子小人之道也君子道長則陽氣發於祥瑞小人道長則陰氣見於災變此天人相與必然之應也易自復之一陽至坤之六陰凡十二卦相往來於一歲之間蓋聖人告人以君子小人之道有相更之勢貴於早防之也在臨則戒之曰八月有凶在泰則戒之曰無平不陂無往不復欲其慎之於八月之前消之於未陂未復之始也陛下欲應變求端謹五事而協庶應消大異而召和氣在乎尊陽抑

陰尊君子之道抑小人之道而已凡天下之道有故有  
新有大有小有老有弱有正有邪有訥有辯有躁有靜  
以對而言之在上偏者皆陽而君子之道也在下偏者  
皆陰而小人之道也上偏欲其過厚下偏欲其常損宜  
厚而薄之宜損而益之則陰盛陽微君子道消小人道  
長其敝至於不可扶持此不可以不察也若夫舊策必  
遷而新策必合大臣依違而小臣執議老成淪伏而弱  
齒簡拔方直踈遠而柔諛親附辯給者獲用而遲蹇者

被退銳進者衰陞而默守者遺落陰盛陽微之變莫著  
於此矣天地告戒之意不為不審願陛下思所以應之  
夫陽不可以不尊陰不可以不抑君子之道不可以不  
進小人之道不可以不退不抑不退其萌雖微及其既  
盛甚可畏也周之衰諸侯僭天子又其衰也大夫僭諸  
侯又其衰也家臣僭大夫又其衰也吳楚盟中國此陰  
盛之極也而春秋自此絕筆矣故臣願陛下早思所以  
救之聖策曰圖講政務則日至中昃而猶多苟簡之習

丞進人材則官無虛假而煩之績用之美臣聞講政務而絕苟簡在於貴遲久進用人材而底績用在於練名實易曰聖人久於其道而天下化成夫聖人之才所過者化所存者神而至於論治定功成之業未嘗不待之以久何也速則粗粗則所得暴而所及淺久則精精則所收博而所被深此聖人之意也盖夫仁必久安義必久由志必久勤法必久守令必久行官必久任士必久養兵必久練游神於累歲之外望化於必世之後夫如

是則心一而慮精事詳而理究德新而道大化浹而澤  
流動乎萬物之上被乎天地之間又何患苟簡之習哉  
聖人無爲不言而海內大治者以能練羣臣數名實也  
官各守其分謂之名職各治其事謂之實丞弼之任責  
之以論道德和陰陽財計之司責之以通有無足國用  
諫官責之以直言得失御史責之以彈戢愆違侍從責  
之以盡規納誨將帥責之以安邊却敵職司責之以一  
路之政守令責之以一郡一縣之治如此舉名以責其

官按實以督其職而庶績弗凝者未之有也今夫大臣下兼財計之柄小官或侵將帥之權侍從言責不得盡其詞職守令不得專其治未見其能無虛假也朝廷設百官於外內皆所以治天下萬事非徒爲空名以付之也欲立一事重建一官欲治一政重遣一使未見其能底績用也聖策曰種羗非不懷徠也而邊候或時繹騷以至臨遣輔臣愴明神武臣以爲禦戎之策失之於素而已夫以邊鄙之重不責統帥之臣而求希合倖進之



小謀金草之機不爲持重之算而聽輕率易動之踈計  
是以其弊在於苟爭小功而忘大憂專趨小利而失大  
信此猾敵所以敢負懷徠之恩踐王圉而抗官師亦吾  
有以致之而已夫敵之未至也制之宜以經遠之策敵  
之既至也禦之宜有應變之術齊景公時燕晉爲寇景  
公患之問於晏嬰而嬰之所薦者穰苴而穰苴卒能逐  
寇而安邦唐憲宗時劉闢爲梗憲宗患之問於杜黃裳  
黃裳所薦者高崇文卒能擒敵而定蜀陛下宜詔輔弼

大臣各薦將才而用之則神武懔於天地之表河湟之外當有解椎髻襲衣冠來獻國地者又豈患奔衝之寇不可禦乎聖策曰蒸民非不愛養也而生業或未完富以至外馳使者布宣惠教臣以爲陛下愛民欲其富而不足以富國遣使宣惠教而適足以爲弊蓋失所以先後之序矣夫事有肇禍而法有起患者不謂事之始法之初也累之至久則弊敗積而禍患起此必至之勢也臣嘗爲陛下深慮後世之患而必爲無窮之弊蓋在乎

富民之道不講而富國之謀太深也凡賦斂之於民古  
人貴其損之而不貴其益春秋書宣公初稅畝成公作  
丘甲哀公用田賦以爲益之不已則勢窮力弊必至於  
變故孔子詳錄其事以貽後世之戒臣嘗觀富國之論  
不起於豐大之世而多出於戰爭之際王者總制六合  
所以服民心而重國體者在吾道德之盛大不繫財貨  
之豐盈易之小畜者德之小者也則曰富以其鄰在泰  
與謙則道之大者也皆曰不富以其鄰夫左右相比之

謂鄰人君之與天下中國之與四夷皆鄰也人君所以運動天下役使四夷道有餘者不假於富德不足者須富行之陛下固宜法謙泰之有餘豈可用小畜之不足是以鉅橋雖積而商不能居敖倉雖盈而秦不能守非無財也道德不建而失天下之心也夫鳥窮則啄獸窮則搏人窮則詐陛下之民可謂窮矣前世所謂無執極之賦大之山海細之草木其利皆已入於官而行於今矣陛下徐思弛費息用以寬民財而逸民力若大禹卑宮

惡服漢文弋緇草謁以澤天下庶幾不致大匱而復出  
泉以取其息寘使以厚其征而求富民宣惠之名不可  
得矣易之剥者始於下也其象曰上以厚下安宅所以  
救剝也陛下取於下悉矣上取下悉則其勢既極而其  
象為剝孟子曰君子用其一緩其二用其二而民有孳  
用其三而父子離臣懼民心積窮不知所出漸為離散  
以至剝落雖有湯禹文武之才無所復施其巧易曰觀  
我生觀民也詩曰念我皇祖陟降庭止陛下觀天下之

勢易離難合一危則不可再安上念五聖之業艱難勤  
苦一敬則不可復正則大富國之謀適足爲深憂未足  
爲陛下利也伏惟發於神斷罷法追使以幸天下以福  
萬世此四方裂眦決目之所共望豈獨賤臣之妄言哉  
聖策曰國用雖節而尚煩於調度兵籍雖衆而未精於  
簡稽臣以爲國用雖節而調度煩者未得節之道兵  
籍雖衆而簡稽疏者未得簡之本也九州土地之產  
撮粟尺布之賦陸輓水漕銜施摩轂日夜合雜以輸太

倉以古準今可謂盛矣至於道途之艱將負之疲京師之一金田野之百金也少府之百金民屋之萬金也夫以萬金之費施之於一燕好之中用之於一賜予之內此類可勝計哉地之財有時民之力有限人君之費無窮以有時有限養無窮此調度所以愈增而不已民力所以愈困而不支也古者宮庭之職百二十員漢之文帝明帝給事宦者不過二人太祖養兵不過十二萬太宗嘗謂近臣曰人君當淡然無欲不使嗜好形見於外

則姦佞無自入矣凡此皆清心節用之本寬民養物之  
要不務先理其本而廣爲調度之求故曰未得節之  
道也今夫能省內郡之黥兵而益以土兵然後兵可簡  
也國家北失幽燕西捐靈夏守邊捍塞無百二之要阻  
是以二邊黥卒恃爲爪牙不可以廢至於方內無事之  
郡百年不識兵革而例設屯伍坐蠹民力此不可不制  
也宜依前世府衛之法使民得以相率出徒而分天下  
郡爲三等上郡五千中郡三千下郡一千而止畱休迭



上不過什一則武備修而簡稽精美周公制禮方五百里謂之大國其車千乘爲五萬五千兵而民不告勞者施之有序制之得術也今之所謂上戶者征斂甚厚而其力困所謂下戶者庸役不及而其勢逸而上戶居其一下戶居其十是常因其一而逸其十也家有二夫古者皆出一兵今皆逸之而不能反斂有限之穀帛以給不耕之墮民此豈周公之心哉故曰未得簡稽之本也聖策曰寬關梁之禁而商賈靡通臣聞錢者無用之

物而聖人貴之者以其能通有用之財也夫以無用而通有用是以貴其通而不貴其積古之所以通貨達財者在乎商賈之職而不在于上今之關市之征密於布綦均輸之利苛於翼虎商旅易業轉爲他技而求財貨之通難矣聖策曰捐器玩之巧而工弗戒此在陛下約已以率爾陛下約已於上則六宮蒙化於內百官率法於朝百姓承流於下及其久也風俗轉移嗜好薄損有其財而無其尊弗敢踰制有其力而非其道不敢敗度則

雖不捐器而工自戒矣臣又聞之天下技巧華靡之玩  
未有不始於京師欲治四方先治京師古之道也夫以  
千里之地而四方之俗皆有焉者唯京師也唯其難制  
之宜甚詳周法六鄉四郊之內自比長主五家積而上  
之至鄉大夫凡萬有八千九百三十六官而後足以致  
京師之治今京師治民之職大不過京兆尹次不過河  
南令而求風敦俗朴是以難也唯陛下擇之而已聖策  
曰風俗浮薄根於取士之無本教道之不明而博詢臺

閣之論所執者不一豈無救敝之道焉凡取士之要不  
過二科曰德行也文辭也而已臣以爲自三代以上可  
以用德行由秦漢以下不過用文辭而臺閣所以異論  
者蓋不過二者之間也陛下必欲以德行取天下之士  
則井田當授也侯國當建也民必家給也官必久任也  
鄉當讀法也家當有塾也而後可以求全德真行致之  
於位如其未也而獨設選舉德行之科是亦無補而已  
夫先世之吏正故所舉者必求仁義孝弟今世之吏邪

故所舉者不過請託嗜好故曰今日取士不過可以用  
文辭爾至於敦俗之本教道之法臣願有獻焉蓋士節  
之重輕未嘗不與體國之安危相應如根本強弱於下  
而枝葉榮枯於上也昔周之士貴秦之士賤夫上有屈  
體下無屈道者貴也舍已所守求合於上者賤也周秦  
治亂考此可見蓋夫士無守道自重之節人有翺蹠不  
恥之求漸漬成俗恬不爲怪未有甚於今日也宜有以  
矯正其弊使士知自重而人蹈廉恥凡潛德獨行不求

聞之君子必深察之而使之常在於必顯仰希俯合昧  
於寵辱之人必深觀之而使之常至於不用則天下皆  
知盛德之意士節一變敦俗之本教道之法自此致之  
可也聖策曰刑罰煩重出於設法之多門訟襲之不革  
而將加恩仁之政使死者少緩必有可行之術焉臣觀  
陛下之意不過欲倣三代之肉刑施之於從坐之死爾  
是未盡觀時制宜之道也古者政敦事樸雖以聖人之  
智而因革之間猶有未盡者肉刑是也斷民之支體使

不爲完人此非聖人之心而三代用之者因革之理有  
未盡也且立尸而祭近於瀆神俎豆而食近於甚野豈  
若後世虛神之位金石爲器哉肉刑之不可用於今猶  
之不可尸祭而俎食夫大辟之科至死而不敢怨者法  
當其罪也儻欲加恩仁之政寬從坐之死則今之律令  
自有減死一等法捨此不用而斷支則足爲駭民驚俗  
之政未足爲可行之術也昔子產欲止伯有之妖必並  
立子孔之後則夫政雖期於推賞而亦貴於慎名使天

下不知朝廷恩仁之意而徒傳告以斲人之足而棄之  
豈所以爲慎名哉聖策曰予欲興七教兼乎三至以底  
聖人之道則宜條其先後之次欲明乎六親盡乎五法  
以極天下之治則宜叙其始末之要此見陛下博稽古  
先欲舉載籍之所傳施之於今以盡聖人之道而盡天  
下之治也臣請深論天下之道先後之次始末之要而  
陛下酌焉蓋德與刑並行於天地之間如寒暑相將而  
未嘗離也於是之間必有先後之次上焉者專德以勝



刑若堯舜之無刑成周之措刑是也中焉者假刑以助德若西漢宣帝任刑名東漢明帝善刑理是也下焉者唯刑而已秦人以刑致亂隋人以刑兆變是也此先後之次不同故治亂之應異也則夫恭老尊齒樂施親賢好德惡貪廉儉之七教至禮不辭而天下治至賞不費而天下悅至樂無親而天下和之三至從而可明其次也抑臣又聞之恐懼寅畏者政之始也驕逸隳惰者政之末也周宣王中興之盛德而不慎於後其詩終爲變

雅唐太宗慈儉英武之主而魏鄭公劉洎馬周之徒咸  
諫以爲漸不及正觀蓋崇高富貴之勢驕逸墮惰之所  
伺也視其有間則入而不能出矣是以聖哲之君遐觀  
遠慮思之於所不思求之於所不求方其大安也必以  
危自厲方其大榮也必以辱自惕不使非常之變起於  
不測而至於不可救也豈非知治道本末之要也歟則  
夫六親之等五法之數又從而可推其要也聖策曰仲  
舒之言班固謂切於當世而可施於今者何策崔寔之

論范曄謂明於政體而有益於時者何事昔班固載仲舒漢廷之策於史其間講天下治亂之理可謂詳矣舉而行之皆足以助治而最可施於今日之策臣以為莫如天道先陽而後陰王政先德而後刑之論也范曄紀崔寔政論數十條於書以為凡所辨論通明政體而言有益於今者則臣以為不足深論者也何者寔之大概欲人主不能純法八世而宜參以霸政嚴刑峻法破姦宄之膽以之行於漢桓帝衰替之世可爾安足為陛下

深論哉策曰無以為古人陳迹既久而不可舉無以為  
本朝之成法已定而不可改惟其改之而適中舉之而  
得宜不迫不迂歸於至當陛下議政法而舉適中得宜  
為言此天下之望也臣安得無辭以致之蓋勢可以舉  
則舉之則不失於陳迹力可以改則改之則不泥於成  
法此因革之常道也至於未適於中未得其宜而改之  
則今日之變法猶或可議焉臣讀易至革卦言天下之  
法至於有弊則不可不革也而辭曰元亨利貞悔亡然

則草之必至於元亨利貞然後悔可亡爾又曰草而當其悔乃亡然則草之而不當益以招悔也夫草之必至於亨然後可以議草變之必至於當然後可以言變斯聖人之能事易象之精義也思之於冥冥索之於昏昏使盡合道義之中而後草之則一法出而天下倚之若山嶽此之謂草而亨謀之於衆多待之以遲久使盡得上下之宜而後變之則一制行而天下望之若雲霓此之謂變而當古之為治相與謨謀於廟堂之上至於風

移俗易徙善遠罪而天下不知其措置之迹者必亨而後草必當而後變也今則不然一法朝出而夕已置一制暮行而曉或弊斧鉞不足以禁謗論竄黜不足以抑煩言其故何邪未決其亨而草之未計其當而變之舉而不必適中動而不必得宜也臣願陛下慎之而已盖夫草而未盡其至則其勢必復草而有復則法以輕而不信矣法制數變變國家之大病也漢徙甘泉后土之祠自是之後三十年間五徙而天地之兆終不能定故願

陛下慎之則至當之論無過於此矣陛下慮臣之憚言而不必行則苟飾行以自免則詔之曰言之非艱行之惟艱又慮其畏避執事而不盡其悃愾也則又曰悉心以陳亦不憚於改為臣是以敢進其私憂過計之說臣聞天下者大物也是以治之者必得大才苟未得大才而委畀之則天下之政終無時而理矣萬鈞之鼎天下之至重也而孟賁烏獲持之奔走踰越險阻若踐平地此無他其力足也使力不足者負之而趨不獨折絕筋

骨又將隨器敗餽而不可救矣易言天下萬物之理至  
詳密矣而至於治天下之難治而未嘗不歸之大才碩  
德之人故屯之不寧必待君子之經綸蠱之敗壞必待  
君子之振育旅之分散必待智者之有為否之欲休必  
俟大人之獲吉聖人以為當四卦之時不得四人者治  
之則愈益其亂而無補於治昔湯之求伊尹也見之耕  
者高宗之求傅說也見之巖築文王之用太公也見之  
漁釣三士者藏迹至深而三君者能舉而用之者以其



取之公求之廣也唐文宗可謂恭儉慈仁勤於致理之主當是時李德裕在其庭而不用裴度捐於外而不使乃覽貞觀政要而歎息又曰吾視開元天寶事則氣拂吾膺然則文宗所以憂勤盡心者徒虛器爾伏惟陛下法成湯高宗文王公聽廣取以為法鑒文宗捨本憂末以為戒獨觀昭曠之道驅馳域外之議不論隱顯不問內外不異遠近不殊明晦才之當者取之德之宜者予之可大者治大可小者治小則天下之才繼踵而起凡

陛下所舉而詢於臣者不治而自治矣陛下有為之術何以先此古人有言曰言切直而不用則身危不切直則不可以明道苟求所以明道又避於危身此勢之不可並者也說不由道憂也由道而不合非憂也苟求所以由道又希於必合此理之不可兼者也臣學術淺陋言論狂鄙罪當萬死無所敢恨幸陛下察焉

歷代名臣奏議卷四十二